

## **Gizakiaren eta egiaren laudorioa**

*XXXII. Rikardo Arregi Kazetaritza Sariaren epaimahaiko kideen adierazpen ezohikoa*

Andoain, 2020.11. 26

UNE GAITZAK ETA ZAILAK BIZI DITUGU, baita Kazetaritzan eta Komunikazioan ere. Oinarrizkoa eta funtsezkoa da berriak jasotzea eta zabaltzea; eta kontu jakina da informazioa ematea eta hartzea dela gizarte aurreratuen berme sozial, politiko, ekonomiko eta kulturalaren giltzetako bat; ez da huskeria bat. Komunikatzeak, gizartean hau eta hura partekatzen ahalegintzeak, eta norbanakoei elkarkide izateko bidea irekitzeak usu du berarekin zailtasuna: dela trebetasunezkoa, dela teknologikoa, edo dela ideologikoa.

Baina, era-erabat zaildu eta trakestu ditu izurriteak gure bizimodua eta ekinbideak oro. Ezagunak ez genituen higie-eredu berrietan trebatu beharrak, lan-jardueretako aldaketa bortitzak, informazio-iturriekin konfiantzazko harremanak eraikitzeak zailtasunak, batzuen eta besteen ezjakintasunak, interes korporatibo jakin batzuek, berri-agentzien dirigismo interesatuak, zerbitzu sekretuen interbentzionismoak, politikari zenbaiten obskurantismoak, berriak zabaltzeko mugak eta ezinak... ez digute, ez, atsedetik eman.

Etxean arazo, auzoan arazo, herrian arazo, aberrian arazo, munduan arazo... hala izan da beti, eta hala da gaur ere, baita Kazetaritzan eta Komunikazioan ere. Gizakia, gizaki denetik, beti arazotan. Baina, horrexek bizi gaitu.

DEKLARAZIO IRMO ETA ZINEZKOA EGIN GURA DU EPAIMAHAIK Gaur, hemen, zuen aurrean, azaroaren hogeita sei honetan, COVID-19 delako birus hori muinetaraino sartu zaigula urtebete dugunean.

Esker oneko eta kritiko izan nahi dugu Kazetaritzaren eta Komunikazioaren aurrean. Ez dugu kolore bakarrean sinesten, ezta zentzu bakarreko esplikazioetan ere. Konplexua da mundua, konplexua behar du hari zuzendutako begiratuak. Konplexua da, beraz, kazetariaren jarduna. Konplexua, komunikazio-ahalegin oro. Errazkeriak ez du ezertan laguntzen. Egoera arruntetan nahiz larrizkoetan, duintasunak eta ardurak gidatu behar dute gure jarduna.

Esker oneko izan gura dugu egoera zail honetan informatzen eta komunikatzen jardun dutenekin. Larrua utzi dute kazetari batzuek larrialdi honetan, eta ez bakarrik zentzu

figuratuan. Bizi izan duguna, bizi duguna, ez da thriller edo nobela beltza izan. Gaixotu eta hil egin da jendea: etxeoak, herrikoak, ezezagunak. Eta, halere, kalera irten eta informatu egin duzue. Gaixotu eta hil egin da jendea: etxeoak, herrikoak, ezezagunak. Eta, halere, komunitatearen funtzionamendua bermatzeko eta elkarren loturak indartzeko komunikazioa lantzen eta aberasten jardun duzue.

Aupa zuek!

Baina, kritiko, oso-oso kritiko izan gura dugu kazetaritzaren eta komunikazioaren jardunean etxekoei, herrikoei eta ezezagunei lagundu ordez, aztoratzen gaituen gaiaren inguruan lastoa eta zirina jaurtitzen ibili direnekin. Ez dira izan gutxi langai hori eskuartean hartu dutenak. Erdizkako egiak, albiste faltsuak, gezur borobilak, eta kanpaina orkestratuek arrisku bizian jarri dute gizakiaren eta komunitatearen osasun fisikoa, gogozkoa, eta politikoa. Ez da amaitu gorotz-oldea, era guztietako konplot informatiboak dabilta gu denon usainean, nondik eraso jo. Pandemikoa zaigu desinformazioa bera ere.

Aski da!

GIZAKIARENTZAKO ETA EGIAZKOTASUNAREN ALDEKO KAZETARITZAN SINESTEN DUGU. Norbanakoaren garapenerako eta egia indartzeko komunikazioan sinesten dugu. Uste baitugu horrek komunitate justuagoa eta solidarioagoa eraikitzen lagundu dezakeela.

Rikardo Arregi Kazetaritza Sarietako 2020. urteko epaimahaiak gizarte-konpromisoari eusten dien kazetaritzaren eta komunikazioaren aldeko urratsak ematera akuilatu, animatu, gura ditu hala profesionalak nola kontsumitzaileak.

Bizi gaitzala kontraesanetan eta zailtasunean beldurrik gabe hausnartzeak, eta kazetaritzan eta komunikazioan ildo duina eta justua jorratzeak.

Hala bedi!

### ***Epaimahaia:***

*Mahaiburua: Mikel Arregi (Andoaingo Udaleko Euskarako zinegotzi arduraduna). Mahaikideak: Jose Inazio Basterretxea, Itxaro Borda, Aingeru Epaltza, Maite Goñi, Elixabete Larrinaga, Ion Muñoa eta Jon Sarasua. Idazkaria: Patxi Baztarrika (Udaleko Euskara teknikaria).*